

մար. ոմանց էլ դպայնութեան դպչելու համար՝
ինչպէս դաշնամուրի մօտից անցնելուց պա-
տահարար ձեռքդ ստեղնաշարի վրայ ես դնում
եւ անսպասելի ձայներին ունկնդիր դառնում :

Աղջիկները գրեթէ միշտ խարուսիկ են :
Գաղտնիք չունին : Միշտ մարմնի նոյն բովան-
դակութեամբ են սպրում :

Ամէն ինչ վաղուց բացայայտ է, բնականօ-
րէն նախատեսուած, ուստի մեղամաղձոտ եւ
յուսահատ :

Կանանց վէպը վաղուց դրուած է մեր հո-
գիների եւ մեր մարմինների մէջ : Նրանց ճակա-
տադիրը սահմանափակ է եւ դաժան, նրանց
դերը՝ ստորին :

Սակայն, ի՞նչ սիրելի է լսել նրանց էու-
թեան մեզմ խարչաքումը եւ յոյզերի հեռաւոր
սարսուռը : Ոմանք, նոր ծլած նշենու ճիւղի
նման, լիալուսինի ոսկէ գերեզման են փնտ-
ռում, ոմանք էլ, արեւի մօտ ծփող ջուրերի
պէս, իրենց կամքն են փորձում . . .

Այսպէս է նաեւ, յոյն բարեկամուհիս, Նա-
թալին :

Նաթալին բարձր է, բարեկազմ, գրեթէ
դասական մարմնով : Լայն բացուած, արքայիք
Աստղիկի, սեւ աչքեր, կանոնաւոր քիթ, ճրգ-
մած կեռասի մէջ թաթախուած շրթունքներ եւ
Կալամաթայի ձիթապտուղի խաւարադոյն
վարսեր :

Նրա մարմնի մէջ ծովի բուրում կայ՝ սուր
եւ շլացուցիչ : Կարծես, կղզիների մեծ կոհակ-
ների ցելիցն է, եւ նայուածքի մէջ կանանչ
կայծեր են բռնկում :

Ամբողջովին հարց է. ծարաւ է՝ անսպասու
ընկած տրիտոնի նման : Զսպուած, վերին աս-
տիճանի ժուժկալ իր անձը բաշխելու մէջ : Իր
առած, անգլօ-սաքսոն կրթութիւնն էլ նպաս-
տում է աթէնական արձանի այս կեցուածքին :

Եթէ Նաթալին սպրէր եւրոպական որեւէ
մեծ քաղաքում, նա կը լինէր «ճակատագրական
կին» :

Հոռմի սալոններում ներկայացող սպան-
հունների նման, նա կը պտտցնէր իր աստուա-
ծային դժգոհութիւնը, սեւաթոյր վերարկուի
տակ կը զսպէր իր մարմնի մարմարէ հրաբու-
խը եւ կը հրճուէր իր լքած երիտասարդների
ինքնասպանութեամբ :

Այստեղ, միջակ այս միջավայրում, Նա-

թալին բնազդաբար զսպում է իր կարելիու-
թիւնները, ամփոփում իր տենդը, սպասում
անխուսափելի օրին :

Սիրում եմ ականջ դնել նրա մէջ արթնցող
փոթորիկներին : Նրա մարմինը ալեկոծուած
ծովի վրայ տատանուող նաւի է նմանում, ո-
գին՝ բռնկած թուփի, նայուածքը՝ անտառում
յանկարծակի երեցած վազրի կայծկլտումին :

Գալիս նստում է աշխատանքիս սեղանի
առջեւ : Ոտքը ոտքի վրայ նետած, կուրծքը չի-
տակ, ձեռքերը սեղմած ծունկի վրայ, գրեթէ
անշարժ :

Հարցերիս, աննշան պատասխաններ է տա-
լիս :

Երկար լուծութիւններով է խօսում :
Երբեմն, փրցնում է վարդի մի փերթ եւ
չրթունքների տակ սեղմում : Անուշ գինովու-
թիւն եմ զգում : Զայնս քիչ դողում է :

Նաթալին, անմիջապէս, աչքերը վայր է
դրում, մի վայրկեան մնում է, ու խոր ժպի-
տով թափանցում է հոգիս :

Քիչ յետոյ, գնում է :
Նաթալին մի մեծ վէպ է փնտռում :
Մի ողբերգութիւն :

* * *

Անատոլին կրակ ու բոցի մէջ է : Եւրոպան
ուժասպառ, անկման նախօրեակին է :

Որբեր, գաղթականներ : Զարհուրելի խեղ-
ճութիւն կուտակուած Վոսֆորի արեւրին : Փո-
ղոցներում՝ կտոր-կտոր մարդիկ, սարսափը
իրենց աչքերում :

Հայաստանից անորոշ լուրեր են գալիս :
Ոչինչ չեմ հասկանում :

Երեկոյեան ուշ վերադարձայ : Թրքերը
տարօրինակ կերպով են նայում : Բարձրաձայն
չեն խօսում, խմբով չեն գնում :

Աւերակների մօտ կանգն առի : Խաւար :
Երկինքը սեւ են ներկել, ոչ մի աստղ : Տարօ-
նակ նախազդացումներ ունեմ : Օդի մէջ ան-
հանգիստ մի բան կայ, հողիներն էլ մութ են :
Հեռուից մի ոտնաձայն : Նա եւս կանգ ա-
ռաւ եւ ետ վերադարձաւ : Ինձանից վարխեց :

Այս գիշեր նոր տան տէրն էլ չի երգում :
Լուսաւորուած է միայն մի սենեակը : Փողոցը
կարծես երկնքի մի անկիւնում կուչ է եկել :
Ես էլ կուչ եմ եկել համայնատարած այս խա-
ւարում : Մէջս մի բան է սառել, բազուկներին